

SIK-p Ataatsimeersuarneranut 2021

Siulersuisuunerit akuerisassatut siunnersuutaat

Siunnersuut

Nunatsinni aatsitassanik qaqtigoortunik uranitalinnik aatsitassarsiorniarnert pillugit SIK-p isumaata ersarissuunissaa pillugu aaliangiussassatut siunnersuut.

Tungavilersuutit

Danmarks Teknisk Universitetimeersut, DTU, kuannersuarni aatsitassat qaqtigoortut uranitalit pillugit Grønlands Geologiske Undersøgelsemit, GEUS-imit misissuinerit inernerit Siulersuisuunernut saqqummiunneqarmata ukiut qulingulerput.

Tamatumunnga atatillugu Siulersuisuunerit ilisimalikkatik suli annertusarniarlugit 2014-imi Canadami uranisiorfinnut paasisassarsiorlutik aamma angalapput. Tassanilu sulisartut sulisitsisullu kattuffii assigiinngitsut aamma ataatsimeeqatigineqaaqtaarput. Kiisalu aamma pisortaqarfinneersut nakkutilliisullu paasisassarsiorfigineqarlutik.

Ukioq 2015-imi Siulersuisuunerit Nakkutilliisoqarfimmut nalunaarutaanni tamakku sukumiisorujussuarmik allaaserineqarnikuupput aammalu annertuumik oqallinneq ingerlanneqarluni, imaqarniliami tamakkiisumik allaaserineqanngikkaluarluni aammalu ersarissumik isummerfigineqanngikkaluarluni.

Aamma massakut Siulersuisuunerit atuuttut aamma ukioq manna aprilimi Greenland Minerals and Energy-mit, GME, paasititsiniaavigineqarlutik saqqummiussivigineqarput.

Taamatut paasisassarsiortarnerit kingunerisaannik, kiisalu aamma Nakkutilliisoqarfimmi oqallittarnerit kingunerisaannik Nunatsinni uranitalinnik qaqtigoortunik aatsitassarsiorniarnert pillugit SIK-p isumaa ersarissuusariaqartoq Siulersuisuunerit isumaqarput.

Nunarput tamaat isigalugu aatsitassaqaqaaq, ilaat qaqtigoortuupput, ilaallu nalunnginnerullutigit, tamanilu tamaani sineriasuatsinni aatsitassanik qaqtigoortunik taaneqartartunik – annerusumik annikinnerusumilluunniit. Aatsitassat qaqtigoortut pillugit Inuiaqatigiinni oqallinneq taamaallaat Kuannersuarnut sammivoq. Tamannalu pitsaasuunersoq qaqugorsuarmut qaluuserineqarsinnaavoq.

Taamaamat Siulersuisuunerit isumaqarput SIK-mi isummertariaqartugut Nunarput tamaat isigalugu, imaangitsoq sumiiffik ataasiinnaq isigalugu.

Siulersuisuunerillu Ataatsimeersuartunut akuerisassatut inassutigaat una:

- Aatsitassanik qaqutigoortunik aatsitassarsiorniarnert SIK-p tapersorsorpai, saniatigut tunisassiassatut uranitaqarpata, uranitaqanngippataluunniit. Taamatut SIK-p aatsitassanik qaqutigoortunik aatsitassarsiornernut tapersuineranut naqissuserlugu erseqqissaatigineqassaaq pinngortitamut avatangiisilu eqqarsaatigalugit illersorneqarsinnaassamat, aammalu sulisartut peqqinnissaat suliffiannilu isumannaallisaaneq salliutinneqassalluni.

Siulersuisuunerit